

广东通志

一

二

三

四

廣東通志卷一百九十九

甲子重刊

金石畧一

御製詩文宸翰

世祖御製訓飭士子臥碑文

禮部

題奉

欽依刊立臥碑曉示生員

朝廷建立學校選取生員免其丁糧厚以廩膳設學院
學道學官以教之各衙門官以禮相待全要養成賢才
以供

朝廷之用諸生當上報

國恩下立人品所有教條開列於後

一生員之家父母賢智者子當受教父母愚魯或有非爲者子既讀書明理當再三懇告使父母不陷於危亡
一生員立志當學爲忠臣清官書史所載忠清事蹟務須互相講究凡利國愛民之事更宜畱心

一生員居心忠厚正直讀書方有實用出仕必作良吏若心術邪刻讀書必無成就爲官必取禍患行害人之事者往往自殺其身常宜思省

一生員不可干求官長交結勢要希圖進身若果心善德全上天知之必加以福。

一生員當愛身忍性凡有官司衙門不可輕入卽有切

己之事止許家人代告不許干預他人詞訟他人亦不許牽連生員作證

一爲學當尊敬先生若講說皆須誠心聽受如有未明從容再問毋妄行辯難爲師長者亦當盡心教訓勿致怠惰

一軍民一切利病不許生員上書陳言如有一言建白以違制論黜革治罪

一生員不許糾黨多人立盟結社把持官府武斷鄉曲所作文字不許妄行刊刻違者聽提調官治罪

順治九年二月初九日

謹案碑在廣州學

聖祖御臨趙子昂秋興賦

行書

晉十有四年余春秋三十有二始見二毛以太尉掾兼虎賁中郎將寓直於散騎之省高閣連雲陽景罕曜珥蟬冕而襲紈綺之士此焉遊處僕野人也偃息不過茅屋茨林之下談話不過農夫田父之客攝官承乏猥廁朝列夙興晏寢匪遑底寧譬猶池魚籠鳥而有江湖山藪之思於是染翰操紙慨然而賦於時秋也故以秋興命篇其辭曰四運忽其代序兮萬物紛以迴薄覽花蔕之時育兮察盛衰之所託感冬索而春敷嗟夏茂而秋落雖末事之榮悴伊人情之美惡善乎宋玉之言曰悲哉

秋之爲氣也蕭瑟兮草木搖落而變衰慘慄兮若
在遠行登山臨水送將歸夫送歸懷慕徒之戀遠
行有羈旅之憤臨川感流而歎逝兮登山懷遠以
悼近彼四感之疚心兮遭一途其難忍嗟秋日之
可哀兮良無愁而不盡野有歸燕隰有翔隼遊氛
朝興槁葉夕隕於時乃屏輕箴釋纖絺藉莞蒨御
袂衣庭樹撼以灑落勁風戾而吹惟蟬嘒嘒以寒
吟雁飄飄而南飛天晃朗以彌高日悠揚而浸微
何微陽之短晷覺良夜之方永月朧朧而含光兮
露淒淒以凝冷熠燿粲於階闥兮蟋蟀鳴乎軒屏
聽離鴻之晨吟望流火之餘景宵耿介而不寐兮

獨展轉於華省悟時歲之遒盡兮慨俛首而自省
斑鬢彫以承弁兮素髮颯以垂領仰羣儔之逸軌
兮攀雲漢以遊騁登春臺之熙熙珥金貂之頽頽
苟趣舍之殊途庸詎識其躁靜聞至人之休風齊
天地於一指彼知安而忘危兮固出生而入死行
投趾於客跡兮殆不踐而獲底闕側足以及泉兮
雖猴猿而不履龜祀骨於宗祧兮思反身於淶水
且斂衽以歸來兮勿投紱以高厲耕東臯之沃壤
兮輸黍稷之餘稅泉涌湍於石澗菊揚芳於厓澨
滲秋水之涓涓兮玩遊鯈之漰漰逍遙乎山川之
阿放曠乎人間之世優哉游哉聊以卒歲 孟頫

康熙甲子孟春臨

康熙貳拾捌年

皇上巡幸浙江於

行在賜

臣趙宏燦恭摹勒石

謹案碑在肇慶端溪書院

聖祖御臨董其昌書

行書

含漱金醴吞玉英遂至不飢三蟲亡心意常和致
欣昌五岳之雲氣彭亨保灌玉廬以自償五形完
堅無災病上覩三元如連珠落落明景照九隅五
靈夜燭煥八區子存內皇與我游身披風衣銜帝
書 甲戌四月臨董其昌

謹案碑在肇慶閱江樓

聖祖御臨米芾書杜甫詩

衛幕銜恩重
潘輿送喜頻
濟時瞻上將
錫號戴慈
親富貴當如此
尊榮邁等倫
郡傳冬筍味
更覺綵
衣春奕葉
斑姑史芬芳
孟母新紫誥
鸞回紙清朝
燕賀人遠依
封土舊國與
大名鄰義方
兼有訓詞
翰兩如神
委曲承顏體
騫飛報主身
可憐忠與孝
雙美盡麒麟
杜少陵詩
元豐二年
孟秋旣望
書襄陽米芾

康熙叁拾捌年

皇上巡幸浙江於

行在賜

臣趙宏燦恭摹勒石

聖祖御臨董其昌新林二月詩

行書

新林二月孤舟還水滿清江花滿山借問故園隱
君子時時來往在人間
臨其昌
康熙叁拾捌年

皇上巡幸浙江賜

臣趙宏燦恭摹勒石

謹案碑俱在肇慶端溪書院

聖祖御製訓飭士子文

國家建立學校原以興行教化作育人才典至渥也朕
臨馭以來隆重師儒加意庠序近復慎簡學使釐剔弊
端務期風教脩明賢才蔚起庶幾棧樸作人之意乃比

來士習未端儒效罕著雖因內外臣工奉行未能盡善
亦由爾諸生積錮已久猝難改易之故也茲特親製訓
言再加警飭爾諸生其敬聽之從來學者先立品行次
及文學學術事功源委有序爾諸生幼聞庭訓長列宮
牆朝夕誦讀寧無講究必也躬修實踐砥礪廉隅敦孝
順以事親秉忠貞以立志窮經考業勿雜荒誕之談取
友親師悉化驕盈之氣文章歸於醇雅毋事浮華軌度
式於規繩最防蕩軼子衿佻達自昔所譏苟行止有虧
雖讀書何益若夫宅心弗淑行已多愆或蜚語流言脅
制官長或隱糧包訟出人公門或唆撥姦猾欺孤凌弱
或招呼朋類結社要盟乃如之人名教不容鄉黨弗齒

縱倖逃褫扑濫竊章縫返之於衷寧無愧乎況乎鄉會
科名乃掄才大典關係尤鉅士子果有真才實學何患
困不逢年顧乃標榜虛名暗通聲氣夤緣詭遇罔顧身
家又或改竄鄉貫希圖進取囂凌騰沸網利營私種種
弊情深可痛恨且夫士子出身之始尤貴以正若茲厥
初拜獻便已作姦犯科則異時敗檢踰閑何所不至又
安望其秉公持正爲國家宣猷樹績膺後先疏附之選
哉朕用嘉惠爾等故不禁反復惓惓茲訓言頒到爾等
務共體朕心恪遵明訓一切痛加改省爭自濯磨積行
勤學以圖上進國家三年登造束帛弓旌不特爾身有
榮卽爾祖父亦增光寵矣逢時得志寧俟他求哉若仍

廣見通志卷一百九十五
視爲具文玩愒弗儆毀方躍冶暴棄自甘則是爾等冥
頑無知終不能教也旣負栽培復干咎戾王章具在朕
亦不能爲爾等寬矣自茲以往內而國學外而直省鄉
校凡學臣師長皆有司鐸之責者並宜傳集諸生多方
董勸以副朕懷否則職業勿修咎亦難逭勿謂朕言之
不預也爾多士尙敬聽之哉

康熙四十一年正月 日

謹案碑在廣州學

聖祖御臨董其昌天馬賦

行書

高君素收唐畫御馬感今無此馬故賦

方唐牧之至盛有天骨之超俊勒四十萬之數而

隨方以分色焉此馬居其中以爲鎮目星角以電
發蹄腕踣以風迅髻龍容而孤起耳鳳聳以雙峻
翠華建而出步閭闔下而輕噴低駑羣而不斯橫
秋風以獨韻若夫躍溪舒急冒絮征叛直突而建
德項繫橫馳而世充領斷咸絕材以比德敢伺蹶
以致客豈肯浪逐金粟之堆故常下視八坊之駿
高標雄跨也獅子攘臂逸氣下衰而照夜矜穩於
是風靡格頽色妙才駘八仗不動終日如坏乃得
玉爲銜飾繡作鞍僮棗秣粟參肉脹筋埋其報德
也蓋不如偷盧啗盜策蹇勝柴鑄黃蝸而吐水畫
白澤而除災但覺駝垂就節鼠伏防猜壯心雖厲

馴號期諧誓俛首以畢世未伏櫪以興懷所謂英
風頓盡冗長常排嗟乎若不市駿骨致龍媒如此
馬者一旦天子巡朔方升喬岳掃四國之塵較岐
陽之獵則飛黃腰褭躡雲追電何所從而遽來何
所從而遽來 壬午冬十二月臨董其昌

康熙四十二年

皇上巡幸浙江於

行在賜

臣趙宏燦恭摹勒石

聖祖御製虎跑泉詩

行書

松林帶餘雪空山啼百舌石罅響涓涓寒泉自清潔

虎跑泉

康熙肆拾貳年

皇上巡幸浙江賜

臣趙宏燦恭摹勒石

謹案碑俱在肇慶端溪書院

聖祖御書萬里波澄四字

皇上御題之四十二年

萬壽初屆五旬爰隆秩望錫以

龍章甚盛典也而南海則以小臣

承烈奉

命祇事焉珠宮貝闕

宸翰寵頒雲漢光華照耀無極百谷之王將永戴而率

舞矣豈止梯航重譯者進海不揚波之頌已哉

戶部右侍郎加七級臣

范承烈

恭紀

陪祭官布